

中華全國
名勝古蹟大觀



福建

第一冊

目次



大陸圖書公司
行 印

中華名勝古蹟

第十一編 湖北

一 武昌

武昌本楚鄂王所封。三國吳爲武昌郡治。孫權初都於此。辛亥改革。爲民軍首義之區。其地南面有山不高。揚子江於此作一大曲折。境內多藪澤。其城瀕於揚子江東岸。

蛇山

蛇山在武昌城中。一名高冠山。山勢起伏。蜿蜒如蛇。上有曾公祠。殿宇高峻。備極雄壯。

洪山

洪山在武昌東門外。上有七級塔。塔下有白龍泉。水色清冽。山麓有陳友諒

之墓。

赤壁

赤壁在嘉魚縣西南大江之濱。劉備與孫權并力拒曹。大破曹操軍。焚其舟艦。俗所傳火燒赤壁者卽此。北與烏村相對。今江漢間稱赤壁者有五。漢陽、漢川、黃州、嘉魚、江夏。惟在嘉魚者合於史冊。

西塞

西塞山在大冶縣東。孫策擊黃祖於此。張志和漁父辭云。西塞山前白鷺飛。桃花流水鱖魚肥。

桃花洞

桃花洞在咸寧縣東南鍾臺山上。洞內有石室。明淨無纖塵。相傳李邕曾讀書於此。

飛雲洞

飛雲洞在大冶縣東回山上。洞口時有雲氣出沒。唐元結嘗構亭於其上。爲退隱之處。

鸚鵡洲

鸚鵡洲在江夏縣西大江中。卽黃祖殺禰衡處。衡嘗作鸚鵡賦。恃才傲世。以致不得其死。

散花洲

散花洲在大冶縣東西塞山前。相傳三國時周瑜旣大破曹操兵後。孫權駐此。釀酒散花。以勞軍士。

黃鶴樓

黃鶴樓在武昌城漢陽門內。世傳費文禕駕鶴憩此。因以名樓。今大半燬圯。改建鐘樓。

南樓

南樓在武昌城司門口。一名庾公樓。相傳庾亮鎮武昌時。嘗於秋夜登樓。與屬吏歌詠。

一一 漢陽

漢陽在武昌之西北。地勢低平。觸處有藪澤。每歲當春夏之交。江漢二水。同時暴漲。常有水災之虞。其城據江漢合流之處。東與武昌隔江。北與夏口隔漢。古今用兵必爭之地。

大別山

大別山在漢陽縣東北。一名魯山。舊有魯肅祠。山之陰有鎖穴。卽孫皓以鐵鎖截江處。

郎官湖

郎官湖在漢陽城中。唐李白泛郎官湖詩序云。白遷夜郎。遇故人尙書張謂。出使夏口。觴於城之南湖。夜月如練。張公顧白曰。夫子可標以佳名。傳之不

朽。白舉酒酌水。號曰耶官。

沔口

沔口在漢陽縣西南。古稱滄浪水。世傳屈原被讒。披髮狂佯。行吟澤畔。問卜於漁父處。

陸子泉

陸子泉在沔陽縣西。舊名文學泉。水甘且冽。陸羽嗜茶。得此泉以試茶味。因改今名。

南紀樓

南紀樓在漢陽縣。宋蔡純臣曾重修之。馮杞詩。可憐南紀樓前路。常與邦人憶蔡侯。

秋興亭

秋興亭在漢陽鳳棲山巔。唐賈至有記云。詩人之興秋最高。故以名亭。孫杓

賦詩以誌其景。有句云。前有長江。後有湖。天將此景屬吾徒。當時想未見秋興。漫說南樓天下無。

卻月城

卻月城在漢陽縣北三里。與魯城相對。以形似卻月。故名。舊傳爲黃祖屯兵之處。

息夫人廟

息夫人廟在漢陽縣北城上。有桃花洞。俗稱爲桃花夫人。每逢春季。桃樹盛開。景絕佳。

三 黃州

黃州卽春秋時黃國地。楚滅黃并之。三國時視爲重鎮。始屬魏。後屬吳。隋置州。明升府。在武昌之東。北阻大別山。南瀕揚子江。負險臨深。與武漢九江相爲首尾。爲全楚門戶。

赤鼻山

赤鼻山在黃岡縣西北十里。屹立江濱。截然如壁。巨石聳削。其色殷赤。世亦稱爲赤壁。宋蘇軾兩遊其地。作前後赤壁二賦。指爲吳魏鏖兵處。誤矣。

五雲山

五雲山在黃安縣東。山上有仰天窩。嵒巖霞舉。僅通一線。平田千頃。遊者以爲不減桃源。

君子泉

君子泉在黃岡縣舊府治內。宋通判孟震亨有賢德。時稱爲孟君子。蘇子瞻因以名泉。

太子泚

太子泚在黃梅縣南。梁武帝初下建業。留丁貴嬪於此。生太子。後人因以名其地。

雪堂

雪堂在黃岡縣城中。宋郡守馬士卿爲蘇軾營地數十畝。是曰東坡。築室其上。以雪中落成。故名。蘇軾居之。因自號東坡居士。復繪雪景於堂之四壁。幽雅絕倫。自爲記。

涵輝閣

涵輝閣在蘄春縣北。宋蘇軾居黃州時。詩酒風流。放誕不羈。客有過之者。自道其霽容天在水。春態柳藏嬌之句。先生以色字易態字。蓋賦涵輝閣也。自是涵輝之名益著。

臨臯亭

臨臯亭在黃岡縣南大江濱。亦名臨臯館。蘇軾題江風山月。本無常主。閒者便是主人。十四字於亭壁。又每於風晨月夜。杖履野步。江水可掬。景物清曠。有飄然出塵之概。

綠楊橋

綠楊橋在蘄水縣東一里。舊名一溪橋。蘇軾有綠楊橋詞序云。春夜行溪水中。過酒家飲。既醉。乘月至一溪橋上。解鞍少休。不覺熟睡。其詞有解鞍欹枕。綠楊橋之句。因更名。

四 德安

德安。春秋時鄖子國也。至宋始改爲府。在漢陽之北。其地北負大別山脈。南有平壤。西河潁河皆南入於漢。京漢鐵路自潁口北上。經應山東北武勝關。穿鑿大別山通過之。

白兆山

白兆山在安陸縣西。一名碧山。上有桃花巖。爲李白讀書處。下有寫經臺及飛仙洞諸勝。

大洪山

大洪山在隨縣西一百二十里。四面陡絕。有懸劍峯。其雄秀爲諸峯之冠。絕頂有龍鬬崖。奇險莫倫。山下有石巖。對峙如門。高數百仞。入石門中。有一石穴。穴中多鍾乳。

夜光池

夜光池在隨縣城內西北隅。卽傳卽隨侯得珠處。一泓清泉。可鑑毫髮。四圍護以石欄。

楚王城

楚王城在雲夢縣東。世傳吳師入郢。楚昭王奔鄖。因築此城以自保。其城址至今猶存。

五 安陸

安陸在德安之西。大別山在其東北。卽爲江漢淮三巨川之分水嶺。地勢低落。藪澤甚多。中以楊桑湖爲大。漢水至潛江縣。別出爲潛。有騎馬隄。當其衝。

春夏水漲。時虞潰決。

曲水池

曲水池在鍾祥縣東門外。梁郡守王綸雅好賓客。時集宴飲。慕蘭亭流觴之勝。因鑿此。

白雪樓

白雪樓在鍾祥縣城內。背倚城曲。前臨漢江。風景清絕。取宋玉陽春白雪之句以爲名。

浩然亭

浩然亭在白雪樓側。昔王維過郢。畫孟浩然像於刺史廳。後因以名亭。皮日休爲之記。

解佩亭

解佩亭在鍾祥縣北漢江濱。相傳爲鄭交甫遇二女解佩處。其東側猶有漢

皋亭遺址

莫愁村

莫愁村在漢江西。相傳盧家有女子。名莫愁。善歌舞。後召入楚王宮。因以名村。樂府莫愁詞曰。莫愁在何處。莫愁石城西。艇子打雨槳。催送莫愁來。

夢野亭

夢野亭在天門縣子城西南隅。亭前遠望。一目而盡雲夢之野。宋嘉祐間。郡守王琪建。晏殊、宋祁、蘇紳、石延年皆有詩。

六 襄陽

襄陽在安陸之西北。其地據荆山之脈。盤結於西。漢水曲折貫其間。自府以西。行於山峽。水清多石灘。自府以南。行於地中。水濁多漲沙。旦夕移徙。稍一不慎。動輒覆舟。其北岸有樊城。夾水相望。爲自古攻守必爭之地。南船北馬。於此分途。商務繁盛。

峴山

峴山在襄陽縣城南。昔羊祜性好山水。每造峴山。置酒言詠。嘗慨然歎息。顧謂鄒湛等曰。自有宇宙。便有此山。由來賢達勝士。登覽此山。如我與卿者多矣。皆湮滅無聞。使人悲傷。如百歲後有知。魂魄猶登此山。湛曰。公令聞令望。必與此山俱傳。

隆中山

隆中山在襄陽縣西北二十里。岡巒起伏。有勢深秀幽邃。卽諸葛孔明隱居之處。

荆山

荆山在南漳縣西北。上有抱璞巖。相傳卞和居此。嘗於山中得玉。獻於楚王。反被讒害。

檀溪

檀溪在襄陽縣西。卽漢昭烈帝乘的盧西走。至此溪一躍而過。溪之陽有徐元直崔州平故宅。故習鑿齒書云。每省家舅。縱目檀溪。念崔徐之友。未嘗不撫膺躊躇。惆悵終日。

沈碑潭

沈碑潭在襄陽縣西北方山麓。晉杜預字元凱。好身後名。作兩碑。自述其南征功績。一碑沈之硯山水中。一碑下之於此潭中。曰。百年之後。滄海桑田。要知不變爲邱陵乎。

呼鷹臺

呼鷹臺在棗陽縣東。一名景升臺。漢劉表所築。表性好鷹。嘗登此臺。歌野鷹來曲。宋蘇軾曾有句云。莫上呼鷹臺。平生笑劉表。

夫人城

夫人城在襄陽縣城西北隅。晉朱序鎮襄陽。符堅遣將圍攻之。序母韓夫人

登城履行。謂西北角當先陷缺。遂領百餘婢。并城中女子。於其角斜築城二十餘丈。賊攻西北角果潰。衆便退守新築城。得以不破。賊亦因其守備固密。遂引退。襄陽人因名曰夫人城。

墮淚碑

墮淚碑在襄陽縣南峴山上。晉羊祜鎮襄陽。有功德於人。及卒。百姓思之。建碑立廟於峴山之上。望其碑者莫不墮淚。杜預因名爲墮淚碑。

七 鄖陽

鄖陽在襄陽之西。地勢高險。當蜀陝荆豫四省之交。北走武關。南通巴峽。漢水橫貫其間。山川阻深。盜賊出入。其城南瀕漢水。房縣卽古之房陵。唐中宗被武后禁錮於此。

景山

景山在房縣北。爲荆山之首。下有三十五溪。皆發源於此。雁北歸。必經其上。

亦名爲雁塞。

紅巖

紅巖在鄖陽縣東。龍滾灘側。舊名赤壁。形勢高峻。土色殷紅。日光霞彩。朝夕掩映。

粉水

粉水在房縣東北。取其水爲粉。鮮潔異於常水。且有清香。或謂卽漢蕭何夫人漬粉處。

忠孝里

忠孝里在房縣城中。以邑中有尹吉甫之忠。黃香之孝。故名。舊有忠孝碑坊。今已廢弛。

八 荆門

荆門在襄陽之南。州城據竹坡河之源。當南北孔道。其西北據內方山。重岡